

四川通志卷之十

輿地志九

山川一

周禮職方氏辨九州之國詳其山鎮澤藪川浸然
無梁州也禹貢以華陽黑水表梁州之域山海經
稱岷山嵎峽江水所出唐書地理志載劍南名山
岷峨青城鶴鳴大川江涪雒西漢而五丁鑿金牛
道通秦塞李冰鑿離堆穿兩江奇怪儼比於巨
靈之高掌遠蹠殆有過之若揚雄所云北屬崑崙

千溪萬谷左思所云龍池瀉瀑漏江伏流者則又
枝峰蔓壑脈絡遠屬焉其閒磅礴鬱積之氣炳靈
載英爰以奠麗一方安瀾萬里榮光美氣效祥乎
聖世流覽者豈徒矜梯棧之神蹤駭漩瀆之險狀也哉

志山川

成都府

成都縣

附郭

武擔山在城內西北隅

元和郡縣志山在縣北百二十步太平寰宇記在府

北一百二十步一名武都山蜀記云武都山精化為女子美而豔蜀王納為妃不習水土欲去王畱

之作東平之歌以悅之無幾物故蜀王乃遣五丁於武都山擔土爲塚蓋地數畝高七丈上有一石厚五寸徑五尺瑩徹號曰石鏡王見悲悼遂作與邪之歌龍歸之曲今都內及毗橋側有一折石長丈許云是五丁擔土擔也武擔山俗名石筍在郭內州城西門之外大街中益部耆舊傳云公孫述時武擔石折任文公歎曰西方智士死吾當應之歲中卒舊志漢昭烈卽位於武擔山之南卽此裴松之曰在縣西北章懷太子曰在縣北二百步明蜀府建於其陽

宋興山在縣北三十里

昇僊山在縣北十里

舊志一名星宿山唐咸通十一年南詔寇成都將軍宋威

敗之蠻退保星宿山梁開平二年王建講武於星宿山卽此

學射山在縣北十八里又名威鳳山

寰宇記學射山一名斛石

山在縣北十五里李膺益州記斛石山有兩女塚
舊志蜀後主禪嘗習射於此故名唐光啟三年王
建攻陳敬瑄拔漢州進軍學射敗敬瑄將句惟立
遂攻彭州附宋文同學射山僊祠記龍圖閣直學
士趙公抃治平二年夏四月被詔守蜀明年春三
月上已來遊學射山主民樂也故事有張柏子者
嘗居此學道以是日成得上帝詔駕赤文菟籥雲
衢徂天闕以去爾後凡其時兩蜀之人如以戒令
約不赴而有所誅責者奔走會其上詣通真觀禱
其神從道士受祕籙以歸一年禍福率指此日情
與恭之所招致也自昔語如此人益起信逮今遠
近以期而至者愈無央數成都燕集用一春爲常
三日不修已云遠甚然各有定處惟此山之會最
盛太守與其屬候城以出鐘鼓旗旆綿二十里無
少缺都人士女被珠貝服繒錦藻績巖麓映照原
野浩如翻江韡如凝霞上下立列窮極繁麗徜徉
徙倚直莫而入公旣至喜遊人之雜遝然復愛其
地距城不一舍而孤嶺橫出夷陸景氣殊曠絕但

謂宮室獨與物不比稱明日召知縣事李君弼賢
語之曰此隸治下載譜籍實號勝處而摹矩制量
諸不如所說柰何議其咎不將屬之於守宰歟予
與君共欲對人不愧中在謀其完矣遂授之宜所
以當然者君曰諾公所命弼賢能爲之乃調匠度
材悉以良法不煩公不傷私未逾時而已云事畢
矣爲三清殿爲先生祠堂爲道宮齋館爲燕宇便
室與凡所以可爲之屋者一一無不有亡慮三十
楹開哈延連輝顯華戶兀於雲際動於林表誠棲
真之厦而合燕之佳觀也自是日而來者嗟頌顧
矚聚吻而談曰此地不知化爲榛墟者凡幾年一
日爲賢者所經慮芟舊而揭新之詎偶然耶豈神
靈所居不可廢待其人而後俾興之耶不然何歷
歲滋久而無一有所問者邪盍延其傳以附於地
志宜矣公因使同文之爲紀其楠四年正月初五
日記田况詩麗日照芳春良辰重元巳陽濱修祓
除華林程射技所向或不同從俗亦足喜門外盛
車徒山半列鄺市彩塲飛鏑遠醉席歌聲起回頭

望城郭煙霞相表裏秀色滿郊原遙影落川涘目
倦意猶遠思餘情未已登高貴能賦感物暢幽旨
宜哉賢大夫由斯見春美楊甲寒食遊學射山詩
疾風吹沙天茫茫日落未落原野黃山空無人石
碌碌路長馬饑石齧足荒臺古林翳雲族何人刻
岫縛層屋當時萬騎填山谷至今拾寶多遺鏃故
國山川愁遠目人世悲歡風雨速凌高舉手天爲
蹙手攀巖樹叩雲木何人唱我悽涼曲興亡一眼
冥冥綠野水平蕪飛雁驚

天回山在縣北三十里舊名天隳唐明皇幸蜀至
此及聞長安平車駕仍回因更名下有天回鎮

龍華山在縣西南五十里濱江山有段文昌讀書

處故名

二江在縣北

大清一統志自灌縣分大江東流經郫縣北又東入縣界繞城北而南與錦江合統名爲二江亦曰都江更記河渠書蜀守李冰鑿離堆避沫水之害穿二江成都之中此渠皆可行舟有餘則用溉百姓饗其利任豫益州記二江者郫江流江也華陽國志李冰穿郫江檢江別支雙流過郡下水經注江水東北經郫縣下又東至縣縣有二江雙流郡下故揚子雲蜀都賦曰兩江珥其前也括地志大江一名汶江一名流江一名笮橋水一名清江一名水江西南自溫江縣流來又云郫江亦名成都江一名市橋江亦名中江亦曰內江西北至新繁縣流來二江竝在益州成都縣界元和志郫江經郫縣北三十一里新繁縣西十一里又都江水在犀浦北四里寰宇記二江秦李冰穿二江於成都城中皆可行舟今謂內江外江是也帶二江之雙流故有雙流縣焉濯錦江卽蜀江水至此濯錦錦彩鮮

潤於他水故曰濯錦江都江水在府西四里一名粉水以此水作粉鮮潔於他汶江一名竿橋水一名流江亦曰外江西南自溫江縣界流入宋元豐志初李冰既鑿離堆又開二渠一由永康過新繁入成都謂之外江俗名走馬河一由永康過郫縣入成都謂之內江舊志內江由城南外江由城北至濯錦橋合流郫江上流至崇寧縣分一支東南流爲走馬河至油子江口又分爲油子河經崇寧縣南東南流十里入郫縣界經郫縣北六里又東流四十里合九曲江入縣界經縣北關外轉東入錦江按今郫縣下流與古異水經注言郫江水從沖里橋北折東絕綿洛經五城界至廣都北岸入江斯爲北江其自成都經廣都者爲南江卽二江也蓋古郫江由灌縣經郫新繁至成都郡下仍北折抵新都過湔洛復折而南至府南舊廣都界合於流江與合沱江始分中合末復分耳因其中合故水經注湔雒亦有郫江之名或者不放其故遂謂郫江卽禹貢沱江非李冰所穿誤矣又內江外

江諸說亦互異元史河渠志以沱湔爲外江郫江爲內江近志以郫江爲外江流江爲內江蓋自成都一府而言則郫爲內江沱湔爲外江自成都一城而言則流江爲內江而郫又爲外江郫江實兼內外之稱也附宋狄遵度鑿二江賦嗚呼吾聞魚鳧氏以降秦太守之前蜀之爲國不幾千萬年方二江之害被茲土以禹之功不是施兮嗟後來亦奚言彼民之昏溺兮無乃得之于天不能遷土而故宅兮其流漂亦誰寬勁崖挺以中亞兮激狂瀾而右旋橫驚折走莫知其所以中亞兮激狂瀾而蛟鼉蠶蟹呀以相濡兮何允蠹而緣延嘬膚吮血沸以咀嚼兮咸飲腐而飽羶荏蒲菱芡紛以相被兮汗百頃之良田土不藝而民無所食兮孰與奏其艱鮮民之害固不可終極兮歷百千萬世天乃授之以賢曰噫中國之無人遂使民至于此焉天之生斯民兮故使之食飽而居安降亍菑以漂之兮天之意不然水之性固就下善利兮決之則宣濬九州而距四海亦奚艱且九載之孜孜民不憚

苦而訴煩蓋因利而爲利兮勞之在先不忍一勤其力兮乃至驚萬世而害弗捐胡不浚發其利源剗削其害根巨崖剖以罅裂兮青顏乾而陷坤怒石奮以交隆兮吁電走而雷奔蕩重淵以傾覆兮喪百怪之精魂雲轉霧溢盤薄蹙躋兮注壑于其閒寂寥散漫肆以長往兮若氣散于垓渾決其餘以旁漑兮居其側數百頃皆膏腴之上珍民降邱而下宅兮若蟻聚而蜂屯則幾年幾世之積害一日刷去兮不啻捐芥而蕩塵嗚呼蜀之爲國非地之中宜乎夷貊之雜處魚鼈之與同有李侯者至然後別類于水物有仲翁者至然後同俗于華風然則今所棟宇而處衣冠而嬉皆二公之所翳若李侯之事固所莫得而繼彼仲翁之教亦何憚而弗爲嗚呼以禹之功至大至神括六合以橫被疇有存而勿論胡茲爲害獨不得聞無乃力所不洎兮抑亦遺其功于後人而今而後乃知民未得所欲事或有不利先世所未暇除去聖人所未及裁制苟有志于生民皆吾人之所事若曰茲事體大

必聖人而後爲則小子也不敢與知

金水河在城內自城西入由城東出而入大江

舊志

唐白敏中所開舊名禁河自高駢築羅城堰糜棗分江水爲二道環城而東出惟餘一脈自城西北隅鐵窗潛流入城歲久遂絕宋天禧中王覲知成都博訪父老得鐵窗石渠故基循渠而上十里許至曹波堰接上流溉餘之棄水于是導之自西門循大達而東注于衆小渠又西南隅至審務前開南流之水自南鐵窗入城于是二渠旣醴股引而東派別爲四大溝脈散于居民夾街之渠而輻輳于米市橋之瀆又東匯于東門而入江民以爲便久之復塞大觀初席旦復疏導之宣和末旦子益以舊渠堙廢復修築城西外堤引江水入城如故作三斗門節之并議歲加修治王明叟度大光范成大相繼修之明初建蜀府于河陽改曰金水河嘉靖中巡撫譚綸復加疏濬

四川通志卷之十一
國朝來久經淤塞雍正九年巡撫憲德復濬舟楫往來
民甚便之又于三橋西北開新河環蜀王城外以
通舟楫詳見水利志

摩訶池在府城內

寰宇記一名汙池蕭摩訶置在錦城西方輿勝覽隋蜀王秀築

廣子城取土于此因爲池陸游渭南集摩訶池入蜀王宮中舊泛舟入此池曲折十餘里至宋世蜀宮後門已爲平陸然猶呼爲水門也舊志明初此池填爲蜀藩正殿西南尚有一曲水光漣漪詳見古蹟志

萬歲池在縣北

華陽國志張儀築成都城取土去城十里因以養魚今萬歲池是也

唐書地理志成都縣北十八里有萬歲池天寶中長史章仇兼瓊築堤積水溉田宋史王剛中傳萬歲池廣袤十里溉三鄉田歲久淤澱剛中疏之累土爲防上植榆枿表以石柱州人指曰王公甘棠

按水經注作萬頃池詳見古蹟志

新泉在城東

附明黃景夔新泉記城東新泉故泉也故泉曷曰新曰以其故之辱也始

浚之若新焉曷曰故之辱出城東百餘步大涂之
旁維泉之源脈長而甘城中井鹵人莫汲汲城之
外東門之人資斯泉顧獨出石閒僅勺挹不受亘
器浸漬溪流沅淖沮如牛馬之過飲且溲焉汲者
守泉不得則于溪匪注盈汰潑不可汲踵踵競次
旱則復于泉沍冬尤艱剖冰取泉饗人息爨俟水
之至汲于北泉又道遠難致論者咸病東泉云予
郊行過泉而喟曰泉哉泉哉曷居于此爾資之深
而功不溥質甚美而蒙不潔斯非爾泉辱哉乃心
惻而新斯泉曷曰新役夫雲集下畝如雨曉穿嵯
斷深入齒齒泓然成池汲者如攜不次不勞不獨
利東門城中之人咸汲焉崇者方臺鹿之峩亭曲
欄四周歆如閑如幽蔭寒冽炙燠之所不及牛馬
之迹無緣而來觀者顧嗟不識其故故曰新既成

飲亭下顧泉而賀曰嘻泉哉自有天地卽有爾泉
豈無主翁咸莫爾顧茲惟新在我慶爾泉之遭謬
予理守罔敢苟安濬清濯汙託風在泉竊志焉抑
謂我畱情事外不急簿領迹亦似之知我乎將由
爾泉乎罪我乎將由爾泉乎乃扁亭曰城東新泉
而刻語于石樹亭中

華陽縣

附郭

大面山在縣治二十八里

六對山在縣南六十里

舊志相傳孟蜀後主自新
津修覺山回至廣都見十

二峰有三峰六對之語故名

鐵爐山在縣南六十里

舊志五代時有日者占此
山當出異人乃掘斷之有

羅氏墓松根纏棺狀若雙龍取刀斷之血流不止

西山在縣西一名雪嶺

錦江在縣南卽流江也自郫縣西分流至府城東

南合郫江折西南入彭山縣界

括地志大江一名汶江一名流江一

名竿橋水西南自溫江縣界流來通典成都府錦江永經注江水自郫縣東北經成都縣南又東至廣都爲南江亦名錦江織錦濯之于此則甚鮮明濯以他水則錦弱矣元和志大江經成都縣七里蜀人又謂之竿橋水此水濯錦鮮于他水又在華陽縣南六里舊志錦江在府城南關外俗名府河卽岷江支流自灌縣東南流經崇寧縣西入郫縣界曰走馬河東南流至合江浦分一小支爲九曲江其正派又東流六十里入成都縣界爲錦江至府城南轉東合郫江下流二十里至二江寺合流爲汶江又南經仁壽縣西北入眉州界其九曲江東北曲注繞府城西北下流五十里入油子河後

國朝

漢建武中吳漢征公孫述乘利逼成都去城十里
阻江北立營作浮橋使副將劉尚屯江南相去二
十餘里述遣將謝豐等攻漢而別遣兵劫尚使不
得相救漢潛師就尚于江南大戰斬豐卽此明末
張獻忠移錦江而涸其流穿地數仞實黃金瑤寶
累億萬下土石以填之然後決堤放流名曰銅金
附元丁復詩蜀江二月桃花春仙子江頭裁錦雲
牙檣定子雙蕩漿蘭葉衝波愁殺人浣花詩客茅
堂小醉眼看春狎花鳥桺絮拋風乳燕斜畫簾捲
雨啼鶯曉薜蘿草生蘭葉齊碧流黛石清無泥郛
筒有酒君莫惜明日殘紅如雨飛
沈廉詩桃花落盡春水生錦江忽作輓雷鳴奔流
欲轉草堂去大聲撼動芙蓉城兩岸迴旋如走馬
飛騰上下馳流星浪花排空百丈立銀河倒瀉天
爲傾一氣渾噩渺無盡乾坤不覺如浮萍憶昔長
江破巨浪風帆乘我空中行身如滄海渺一粟性
命直與蛟龍爭今日江城看春漲披襟想像神猶
王安得呼起浣花翁相與乘舟坐天上又江口行